

UNIVERZITET U BIHAĆU

S E N A T

P R A V I L N I K
O NAČINU DODJELE POČASNOG ZVANJA PROFESOR
EMERITUS

Bihać, mart 2017. godine

Na osnovu člana 61. i člana 216. stav (4) Statuta Univerziteta u Bihaću, u skladu s članom 98. Zakona o visokom obrazovanju („Sl. glasnik USK-a”, broj:8/09, 9/10, 4/11 i 6/13), na prijedlog Rektora, Senat Univerziteta u Bihaću na svojoj XII (dvanaestoj) redovnoj sjednici održanoj dana 21.03.2017. godine, donio je

P R A V I L N I K **o načinu dodjele počasnog zvanja profesor emeritus**

Član 1.

Pravilnikom o načinu dodjele počasnog zvanja profesor emeritus i pravima profesora emeritusa na Univerzitetu u Bihaću (u daljem tekstu Pravilnik) pobliže se uređuju uslovi i postupak za dodjelu počasnog zvanja profesor emeritus, te prava profesora emeritusa na Univerzitetu u Bihaću.

Član 2.

Počasno zvanje profesor emeritus dodjeljuje Senat Univerziteta u Bihaću redovnim profesorima u penziji/mirovini, koji su penziju stekli radom na Univerzitetu u Bihaću ili njenim članicama.

Član 3.

Kandidat za izbor u počasno zvanje profesor emeritus mora imati posebne zasluge za razvoj i napredak Univerziteta, te međunarodno priznatu nastavnu, naučnu ili umjetničku aktivnost, odnosno njoj ekvivalentne priznate rezultate, te za svoj nastavni predmet uvedenog nasljednika.

Član 4.

Kriteriji koji se vrjednuju za dodjelu počasnog zvanja emeritus su:

- objavljeni radovi u inostranstvu, koji su referirani u bazama CC, SCI ;
- mentorstva;
- publicirani udžbenici i monografije za univerzitetsku nastavu;
- domaći i međunarodni istraživački projekti (glavni istraživač, voditelj projekta, najmanje jedan međunarodni i više domaćih projekata);
- organiziranje ili sudjelovanje u međunarodnim naučnim skupovima; uređivanje zbornika radova;
- vođenje projekata u kojima su magistri ili doktori mladi istraživači;
- preuzimanje/citiranje radova u stranim publikacijama;
- međunarodne nagrade i priznanja za naučni rad;
- organiziranje postdiplomskog studija ili učestvovanje u izradi nastavnog plana i programa smjera ili odsjeka;
- održana predavanja na međunarodnim skupovima ili visokoškolskim ustanovama u inostranstvu;
- članstvo u međunarodnim i domaćim profesionalnim udruženjima i odborima međunarodnih konferencija;
- posebne zasluge za razvoj i napredak Univerziteta u Bihaću.

Član 5.

Profesor emeritus ima savjetodavnu ulogu na Fakultetu/VŠ-i koji ga je predložilo za izbor u to zvanje.

Profesor emeritus može sudjelovati u izvođenju dijela nastave na drugom i trećem ciklusu studija, biti član komisije u postupcima izbora u naučno-nastavna zvanja te u postupcima za sticanje magisterija i doktorata nauka, iznimno, na osnovu posebne Odluke Naučno-nastavnog vijeća fakulteta, može biti mentorom magistarskih i doktorskih radova.

Profesor emeritus ima pravo sudjelovati u naučno-nastavnom i naučno-istraživačkom radu na Univerzitetu.

Član 6.

Fakulteti/VŠ-a u sastavu Univerziteta dužni su voditi računa o tome kada pojedini od njegovih zaslužnih profesora odlazi u penziju/mirovinu te s time uskladiti svoje prijedloge za izbor u zvanje profesor emeritus.

Član 7.

Članice iz predhodnu saglasnost rektora, pokreću postupak dodjele zvanja profesor emeritus dostavom obrazloženog prijedloga Senatu Univerziteta u Bijaću.

Rektor je dužan u roku od 30 (trideset) dana pismeno se odrediti o prijedlogu članica Univerziteta.

Član 8.

Prijedloge Fakulteta/VŠ-e u sastavu Univerziteta, Senat Univerziteta u Bijaću razmatra jednom tokom akademske godine.

Fakultet/VŠ-a dostavljaju Senatu Univerziteta obrazloženi prijedlog koji sadrži:

- saglasnost kandidata ,
- životopis i popis radova ,
- opis posebnih zasluga i
- garanciju predlagača da će osigurati sredstva za njegov rad (prostor, oprema, i drugo).
- predhodnu saglasnost Rektora iz člana 7. ovog Pravilnika.

Član 9.

Po prijemu Prijedloga iz člana 8. stav 2. ovoga Pravilnika Senat Univerziteta imenuje Komisiju za ocjenu prijedloga od najmanje tri redovna profesora.

Većina članova Komisije mora biti izvan Fakulteta/VŠ-e koje je podnijelo prijedlog.

Članovi Komisije imaju pravo od predlagača zatražiti dodatnu dokumentaciju o njegovom kandidatu.

Član 10.

Komisija iz člana 9. ovoga Pravilnika podnosi Senatu Univerzitetu Bijaću pisani izvještaj u skladu sa članom 4.ovog pravilnika, s ocjenom i svojim mišljenjem, koje potpisuju svi članovi komisije.

Član 11.

Senat Univerziteta odlučuje o dodjeli počasnog zvanja profesor emeritus na osnovu pozitivnog izvještaja stručne komisije, većinom glasova ukupnog broja članova Senata.

Član 12.

Postupak izbora u zvanje profesor emeritus propisan ovim Pravilnikom primjenjuje se na kandidate za zvanje profesor emeritus koji su penzionisani/umirovljeni prije donošenja ovog pravilnika i koji će biti umirovljeni nakon njegovog donošenja.

Rektoru/rektorici, koji su u zvanju redovnog profesora penzionisani, po položaju koji su obnašali dodjeljuje se počasno zvanje profesor emeritus posebnom odlukom Senata, na prijedlog Kolegija Rektora.

Član 13.

Stupanjem na snagu ovog Pravilnika stvalja se van snage Pravilnik o načinu dodjele počasnog zvanja profesor emeritus i pravima profesora emeritusa na Univerzitetu u Bihaću, broj:06-320/2007 od 07.03.2007. godine.

Član 14.

Ovaj Pravilnik stupa na snagu osmog dana od dana objavljivanja na oglasnoj ploči Univerziteta u Bihaću i WEB stranici Univerziteta u Bihaću.



Predsjednik Senata

Prof. dr. Fadil Islamović

Broj:06-1945/2017
Bihać, 21.03.2017. godine

Pravilnik je objavljen na oglasnoj tabli Rektorata i WEB stranici Univerziteta u Bihaću dana 23.03.2017. godine, a stupio je na snagu dana 31.03.2017- godine.



Predsjednik Senata

prof. dr. Fadil Islamović